

Panalangin ng mga Kristiyano sa Maghapon
LITURGY OF THE HOURS

PANALANGIN SA TAKIPSILIM

Ika-25 ng Pebrero, 2025
{ Ika-7 Martes sa Karaniwang Panahon }



Tumayo at garwin ang tanda ng krus

O Diyos, halina at ako'y tulongan.

— O Panginoon, magmadali ka sa iyong pagdamay.

Papuri sa Ama, at sa Anak, at sa Espiritu Santo.

— Kapara noong una, ngayon at magpasawalang hanggan.
Amen.

AWIT

Lulubog na ang araw, maglalahong tuluyan,
Maghapo'y matatapos, pasok ang kadiliman.
Ilaw mo, PANGINOON, sa amin po'y itanglaw,
Puso ay liliwanag sa pag-ibig na bigay.

Ngalan mo'y pinupuri, ngayon kami'y may galak;
Tingnan kami't ingatan hanggang mayroong bukas.
Kasama ng mga banal, aawit kaming lahat.
Ikaw ay pupurihi't kami ay iniligtas.

Diyos Ama na dakila, Anak na mapagpala,
Banal na Espiritu, Isang Diyos na dakila;
Papuring walang hanggan, aawit nang may tuwa
Dahil sa kabutihang kaloob mo sa madla.

Umupo o tumayo

MGA ANTIPONA AT SALMO

Antipona 1

Iniiingatan ng Panginoon ang kanyang bayan sa pamamagitan ng kanyang lakas.

Salmo 125

(Ang PANGINOON, tagabantay ng kanyang bayan)

Parang Bundok Sion,
Ang taong sa PANGINOON ay nagtitiwala,
Kahit na kaila'y
Hindi makikilos di rin mauuga.

Itong Jerusalem

Ay naliligiran ng maraming bundok,
Gayon nagtatanggol
Sa mga hinirang ang PANGINOONG ating Diyos.

Yaong masasama
Ay di tutulutang laging mamahala,
Pagkat maaaring
Ang mga hinirang, mahawa sa sama.

Ang mga mabait
Na tapat sumunod sa 'yong kautusan,
Sana'y pagpalain mo sila, O PANGINOON, sa kanilang buhay.
Ngunit ang masama, sa kanilang hilig iyong parusahan,
Parusahan sila, dahil sa di wasto nilang pamumuhay.

Tanggapin Israel, ang kapayapaan!

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Iningatan ng Panginoon ang kanyang bayan sa pamamagitan ng
kanyang lakas.

Antipona 2

Maliban na matulad kayo sa isang bata, hindi kayo makapapasok sa
kaharian ng Diyos.

Salmo 131

(Pagtitiwala sa Diyos tulad ng sa bata)

O PANGINOON ko, ang pagmamataas,
Tinalikdan ko na at iniwang ganap;
Ang mga gawain na magpapatanyag
Iniwan ko na rin, di ko na hinangad.

Mapayapa ako at nasisiyahan,
Tulad niyong sanggol sa bisig ni Inay.

Kaya mula ngayon, ikaw, O Israel,
Sa 'yong PANGINOON, magtiwalang tambing!

Papuri sa Ama, at sa Anak, at sa Espiritu Santo,

Kapara noong una, ngayon at magpasawalang hanggan. Amen.

Antipona

Maliban na matulad kayo sa isang bata, hindi kayo makapapasok sa kaharian ng Diyos.

Antipona 3

Panginoon, hinirang mo kami bilang bansang nagkakaisa at mga pari para sa Diyos na aming Ama.

Awit: Pahayag 4:11; 5:9, 10, 12

(Himig ng Pagliligtas)

Aming PANGINOON at Diyos!

Karapat-dapat kang tumanggap ng papuri,
Paggalang, at kapangyarihan;

Pagkat ikaw ang lumalang sa lahat ng bagay,
At ayon sa iyong kagustuhan,
Sila'y nilalang mo at pinananatili.

Ikaw ang karapat-dapat na kumuha sa kasulatang nakalulon
At sumira sa mga tatak niyon.

Sapagkat pinatay ka, at sa pamamagitan ng iyong kamatayan
Ay tinubos mo para sa Diyos ang mga tao,
Mula sa bawat lipi, wika, bayan, at bansa.

Ginawa mo silang isang liping maharlika
At mga saserdote para maglingkod sa ating Diyos;
At sila'y maghahari sa lupa.

Ang Korderong pinatay ay karapat-dapat
Na tumanggap ng kapangyarihan,
Kayamanan, karunungan, at kalakasan,
Papuri, paggalang at pagdakila!

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Panginoon, hinirang mo kami bilang bansang nagkakaisa at mga pari para sa Diyos na aming Ama.

Umupo

PAGBASA NG SALITA NG DIYOS

Roma 12:9-12

Maging tunay ang inyong pag-ibig. Kasuklaman ninyo ang masama, pakaibigin ang mabuti. Mag-ibigan kayo na parang tunay na magkakapatid. Pahalagahan ninyo ang iba nang higit sa pagpapahalaga nila sa inyo. Magpakasipag kayo at buong pusong maglingkod sa PANGINOON. Magalak kayo dahil sa inyong pag-asa. Magtiyaga kayo sa inyong kapighatian, at laging manalangin.

Tugunan

O Panginoon, ang iyong pangako’y di matitinag kailanman.

— O Panginoon, ang iyong pangako’y di matitinag kailanman.

Hindi maglalaho ang iyong katapatan,

— ang iyong pangako’y di matitinag kailanman.

Papuri sa Ama, at sa Anak at sa Espiritu Santo.

— O Panginoon, ang iyong pangako’y di matitinag kailanman.

Tumayo

PAPURING AWIT NI MARIA

Antipona

Ang puso ko’y nagpupuri sa Diyos na aking Tagapagligtas.

Lukas 1:46-56

Gumawa tanda ng krus

Ang puso ko’y nagpupuri sa Panginoon,
At nagagalak ang aking espiritu dahil sa Diyos na aking
tagapagligtas.

Sapagka’t nilingap niya ang kanyang abang lingkod!

At mula ngayon, ako’y tatawaging mapalad ng lahat ng salinlahi,
Dahil sa mga dakilang bagay na ginawa sa akin ng

Makapangyarihan —

Banal ang kanyang pangalan!

Kinahahabagan niya ang mga may takot sa kanya,
Sa lahat ng sali't saling lahi.

Ipinakita niya ang lakas ng kanyang mga bisig,
Pinangalat niya ang mga palalo ang isipan.

Ibinagsak niya ang mga hari mula sa kanilang trono,
At itinaas ang mga nasa abang kalagayan.

Binusog niya ng mabubuting bagay ang mga nagugutom,
At pinalayas niyang wala ni anuman ang mayayaman.

Tinulungan niya ang kanyang bayang Istaël,
Bilang pagtupad sa pangako niya saating mga magulang,
Kay Abraham at sa kanyang lahi, magpakailanman!

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Ang puso ko'y nagpupuri sa Diyos na aking Tagapagligtas.

PANGKALAHATANG PANALANGIN

Itinatag ng Diyos ang kanyang bayan sa pag-asa. Manawagan tayo sa kanya nang may kagalakan:

— Ikaw ang pag-asa ng iyong sambayanan, Panginoon.

Panginoon, pinasalamatan ka namin,
sapagkat kay Kristo ipinagkaloob mo sa amin ang lahat ng yaman
ng karunungan at kaalaman.

— Ikaw ang pag-asa ng iyong sambayanan, Panginoon.

O Diyos, sa iyong mga kamay nakasalalay ang puso ng mga
makapangyarihan; gawaran mo ng karunungan ang mga
namumuno sa aming pamahalaan,
manangan nawa sila sa bukal ng iyong salita at malting kalugud-
lugod sa iyo sa pamamagitan ng kanilang iniisip at inaasal.

— Ikaw ang pag-asa ng iyong sambayanan, Panginoon.

Maglarawan nawa ang talino ng mga nasa sining ng iyong
kagandahan,
ang kanilang mga gawa'y magbigay sa mundo ng pag-asa at

kagalakan.

— Ikaw ang pag-asa ng iyong sambayanan, Panginoon.

Hindi mo hinahayaang subukin kami nang higit sa aming kakayahan,
palakasin mo ang mga mahihina at itaas ang mga nanlulupaypay.

— Ikaw ang pag-asa ng iyong sambayanan, Panginoon.

Sa pamamagitan ng iyong Anak, ipinangako mong bubuhayin ang mga tao sa Araw ng Paghuhukom,
huwag mong kalilimutan ang mga yumao.

— Ikaw ang pag-asa ng iyong sambayanan, Panginoon.

Ama Namin

Ama namin, sumasalangit Ka
Sambahin ang ngalan Mo
Mapasaamin ang kaharian Mo
Sundin ang loob Mo
Dito sa lupa, para nang sa langit.
Bigyan Mo kami ngayon ng aming kakanin sa araw araw.
At patawarin Mo kami sa aming mga sala,
Para nang pagpapatawad namin
Sa mga nagkakasala sa amin.
At huwag Mo kaming ipahintulot sa tukso,
At iadya Mo kami sa lahat ng masama.
Sapagkat Iyo ang kaharian, at kapangyarihan,
At ang kadakilaan, magpakailanman.

PANGWAKAS NA PANALANGIN

Ama,
amin nawang maitaas sa iyo
ang panalangin sa takipsilim
at bumaba sa amin ang pagpapala mo.
Mapasaamin nawa ang iyong pagliligtas at tulong
ngayon at sa lahat ng panahon.
Hinihiling namin ito sa pamamagitan ni Hesukristo
kasama ng Espiritu Santo magpasawalang hanggan.

— Amen.

Paghayo

Pagpalain nawa tayo ng panginoon, iligtas tayo mula sa lahat ng kasamaan at akayin tayo sa buhay na walang hanggan.

— Amen.

PANALANGIN NG MGA KRISTIYANO SA MAGHAPON

Ang mga tekstong biblikal at mga Papuring Awit na ginamit ay halaw mula sa **MAGANDANG BALITA BIBLIA**. Karapatang-sipi @ 1973, Philippine Bible Society, U.N. Ave., Manila.

Ang mga titik ng mga Awit at ang mga disenyong pansining ay likha ni Padre Mar DJ Arenas.

Karapatang-sipi @ 1994, **LUPON REHIYONAL UKOL SA TAGALOG SA LITURHIYA**.

Archdiocesan Liturgical Commission, Manila



mobile prayers



UNITED STATES OF AMERICA
www.ebreviary.com